



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Cumischiuns cumünalas

La **cumischiun da planisaziun** (culla giunta sco instrumaint operativ) es gnüda installada in occasiun da la revisiun totala da la planisaziun locala d'urant ils ons 2001 fin 2004. Davo cha la Regenza ha approvà la planisaziun in december dal 2005 nun ha'la gnü plü ingüna funcziun. Il cussagl ha perquai decis da tilla abolir. Per dumondas da planisaziun importantas pel cumün as pudessa installar in avegnir gruppas da lavur o üna cumischiun passagera. La giunta da trafic vain mantgnüda, dvainta però üna cumischiun.

Il president da la **cumischiun da fabrica**, Marco Müller, ha demischiunà pella fin da l'on 2008. In sia piazza vain elet Marcus Wetzel, cusglier cumünal cul dicasteri fabrica e planisaziun. Ulteriur e 5avel commember dvainta Arno Ritzmann.

Nouva cundiziun per permiss da fabrica

D'urant la stà e l'utuon 2008 haja dat adüna darcheu reclamaziuns pervi da vias insuos-chadas il's cuntuoorns da piazzals da fabrica. In avegnir cuntengnan ils permiss da fabrica eir la seguainta cundiziun: "Insuos-chamaints da vias e piazzas publicas in connex cul fabricat sun d'evitar tant sco pussibel. Vias chi vegnan suos-chas pervi da lavuors da fabrica o transports sun da pulir infra ün di (tenor art. 10 da la ledscha da pulizia dal cumün da Scuol). Scha quai nu capita po il cumün ordinar chi vegnan pulidas a cuosts dal patrun da fabrica."

Attach Scuol ost vi da la Via d'Engiadina

L'uffizi chantunal da construcziun bassa ha publichà il proget per la sanaziun da l'attach manzunà. Eir il cussagl cumünal ha tut posiziun ed exprimi tsherts giavüschs, tanter oter a reg. la fuormaziun, la protecziun da la fontana da Sotsass e la recultivaziun cun bos-cha. El ha eir dumandà schi füss pussibel d'ameglidar l'attach da la Via da S-charl in connex cun quist proget (ils cuosts correspundents vess natüralmaing da surtour il cumün). Plünavant ha'l rendü attent cha'l trafic nu das-cha gnir impedi massa ferm tras il fabricat d'urant ils mais lügl ed avuost.

Revisiun parziala da la planisaziun locala

Pel bain San Jon es gnüda s-chaffida a seis temp üna zona speciala per cha la gestiun da chavagls da Men Juon as possa sviluppar adequatamaing. Uossa as muossa vieplü cha las prescripziuns da quella zona sun massa restrictivas. Il cussagl es perquai pront da far üna revisiun parziala. Fin uossa d'eiran fixats ils fabricats, nouv dessa be plü areals. A l'intern da quels füss il proprietari plü liber. La zona resta però dadour la zona da fabrica, q.v.d. cha mincha proget douvra eir l'acconsentimaint da l'uffizi chantunal pel svilup dal territori.

Uniun dals Grischs

Daspö blers ons pajan ils cumüns a l'Uniun dals Grischs üna contribuziun annuala d'ün franc per abitant. Tenor infuormaziun da l'UdG nu basta quai plü per cuvernar ils cuosts ed ella dumonda perquai d'augmantar la contribuziun sün CHF 1.50 per abitant ed on. Il cussagl accepta quist augmaint.

Cuors da rumantsch per uffants pitschens e genituors

Üna cumischiun "Avegnir scoulina e scoula rumantscha a Scuol" s'ha occupada l'on passà cul fat cha vieplü genituors cun uffants pitschens nun inclegian e discuorran rumantsch. Uossa cumainza ün cuors per genituors ed uffants pitschens (avant l'età da scoulina) chi nu spordscha be instrucziun da la lingua rumantscha, dimpersè voul eir s-chaffir üna relaziun cul cumün, sia cultura e sias üsanzas. Il cumün surpiglia üna part dals cuosts, siond chi voul plü tard damain lecziuns d'agüd in rumantsch illa scoulina e las prümas classas da scoula.

Fös artificials vi Vulpera

Als 20 december 2008 a mezzanot haja dat vi Vulpera ün fö artificial. La canera im connex cun tals evenimaints as doda eir a Scuol. Il cumün ha tut sü contact cul cumün da Tarasp, siond cha quai nun es stat il prüm disturbi dal silenzi nocturn nan da Vulpera chi'd ha dat andit a reclomaziuns.

Plan da quartier Chaschiners

Il cussagl cumünal ha deliberà il plan da quartier Chaschiners (areal Engadinerhof) pell'exposiziun publica. Quella vain fatta illa Posta Ladina ed illas chaistas nairas, il temp da publicaziun düra dals 29 schner fin als 28 favrer 2009.

Surdattas da lavur

Il büro d'indschegniers Caprez SA ha survgni l'incumbenza d'elavurar ün concept in connex cul trafic sül Stradun pro l'imboccadüra da la Via dals Bogns, quist dess gnir fat in connex cul plan da quartier Polenta.

Dumondas da fabrica

Il cussagl resp. la direcziun han dat ils seguaints permiss da fabrica:

- a la Hotel Guarda Val Scuol AG per üna chasa nouva sün parcella 511, Vi
- a la direcziun federala da dazi (Corp da guardgias da cunfin) per ün indriz da transmissiun (alber e stabilimaint da gestiun) aint il God da Pradatsch, Val S-charl
- a las Pendicularas Motta Naluns Scuol-Ftan-Sent SA per ün kiosk cun restorantin our'il liber sper il "Kinderland" sü Motta Naluns

sco eir a divers patruns da fabrica per müdamaints da progets fingià sancziunats e per lavuors da renovaziun o müdamaints interns.

Üna dumonda per ün chamin extern es gnüda refüsada in basa al güdicat da la cusglianza da fabrica. L'argumaint principal es stat cha ün tal chamin nu s'affetscha culla chasa engiadinaisa e ch'el es in quel cas fermamaing visibel.

FANESTRIGLS IN CHASA CUMÜNALA

Daspö ils 1. december 2008 sun tuot ils fanestrighs in chasa cumünala averts mincha gövgia fin las 19.00h.

Fin uossa nu s'haja gnü l'impreschiun cha quista sporta correspuonda propcha ad ün bsögn da la populaziun. Forsa nun è'la amo cuntschainta avuonda. La fasa da prouva vain perquai prolungada.